

RADUNANZA CUMÜNELA

103. Protocol dals 23-11-2022 - 20.15 h

Il vicepresidente cumünel, sar Ramun Ratti, po salüder 50 persunas cun dret da vuscher a la radunanza cumünela illa Seletta da la chesa da scoula. In sieus plets da bivgnaint manzuna el l'absenza dal president cumünel chi'd es s-chüso causa motivs da sandet, e que fin pü u main la fin dal mais schner dal 2023. Il cussagl cumünel as ho organisò d'uraunt l'absenza e scumpartieu parts dals decasteris nouv. Sar cusglier Luzi Schucan surpiglia las finanzas, sar cusglier Luis Wieser l'agricultura, las alps ed il forestel ed il vicepresidente Ramun Ratti agescha scu president ad interim. El surpiglia ils decasteris da l'administraziun generela, pulizia, lavinas ed il provedimaint social. Sar Ramun Ratti manzuna impü ils divers progets d'infrastructura chi haun pudieu gnir realisos d'uraunt l'an 2022. Eir ils temas actuels, la periclitaziun da maungel d'energia ed il maungel da spazi d'abiter per indigens nu vules el manchanter, e tuorna pü tard sün quists.

Scu scrutinaduors vegnan numnos e tschernieus sar Gian Rico Blumenthal per la vart vers Arpiglia e sar Peider Gotsch per la vart vers Albanas inclus il cussagl cumünel.

La bannida e la missiva sun gnidas tramissas als votants e las votantas da Zuoz infra temp ütil tenor artichel 30 da la constituziun. Las tractandas vegnan acceptedas unanimamaing scu propostas.

606 01 Organisaziun da vschinauncha
 01.C Radunanza cumünela
 01.D.01 Approvaziun protocol

1. Protocol da la radunanza cumünela dals 17 avuost 2022

Il vicepresidente cumünel orientescha, cha dal protocol da la radunanza cumünela dals 17 avuost 2022 ho pudieu gnir piglio invista sülla pagina d'internet da la vschinauncha ed in chanzlia cumünela dals 9 settember fin ils 10 october 2022. Siand cha nu sun entredas remarchas u objecziuns vela il protocol da la radunanza cumünela dals 17 avuost 2022 scu accepto. Il vicepresidente ingrazcha al chanzlist per la cumpilaziun.

607 03 Finanzas
 03.H Büdschet

2. Preventiv per l'an 2023

Il vicepresidente fo üna cuorta introducziun a quista tractanda. El spiega cha'l cussagl cumünel ho sur lavuro il preventiv 2023 in quatter tschantedas, que da maniera conservativa. Il vicepresidente surdo il pled a sar cusglier Lucian Schucan scu depüto da las finanzas.

Impü bivgnainta el il contabel da l'administraziun cumünela, sar Beat Schärer, chi sto a disposiziun per dumandas da detagl.

Plan da finanzas

A maun da diversas folias infurmescha sar Luzi Schucan sur dal cuntegn dal plan da finanzas, sur dals progets previs i'ls prossems ans. Ils progets previs a partir dal 2024 nu sun in quel sen sacrosancts, planisaziuns nu sun avaunt maun. Per part es manifesto ün importaint il preventiv d'investiziuns per l'an 2023 per invier las planisaziuns. Speciel manzuna sar Luzi Schucan ün proget per ün lej da bagner e per l'innaivamaint ed eir la dumanda da la cuntinuaziun dal proget da la fibra optica illa vschinauncha da Zuoz. El agiundscha eir cha l'experienza muossa, cha na tuot ils progets previs vegnan realisos e per divers dals progets es eir avaunt maun la finanziaziun sur las finanziaziuns specielas.

Preventiv per l'an 2023

A maun d'üna preschantaziun cul power-point repassa il depüto il preventiv per l'an 2023, la valütaziun finanziaza e'l preventiv d'investiziuns per l'an 2022. Inavaunt declera el ch'üna fich granda part dals cuosts es chaschuneda tres terz e cha la vschinauncha nun ho niauncha pü üna grand 'influenza süllas cifras. In basa da tabellas muossa'l inua cha que do, in conguel cul büdschet per l'an 2022, müdamaints pü grands. Ils cuosts e las entredgias progettedas dal preventiv as baseschan sü'l preventiv 2022 e süls resultats da l'an curraint. Ils müdamaints pü grands sun declaros in detagl illa missiva. Las entredas d'impostas sun calcedas cun ün pè d'impostas da 65% da las impostas simplas chantunelas. Zieva tuot quists adattamaints serra il preventiv 2023 cun ün suravaunz da las expensas da CHF 365'754.00. Il „Cash-Flow“ s'amuntan a CHF 581'614.00 che chi'd es tenor sar Luzi Schucan püchöntschi bass. A regard il pè d'impostas remarcha il depüto da finanzas, cha cun ün pè da 65% as es congualabel cun vschinaunchas scu per exaimpel Meilen al Lej da Turich. La spranza es, cha ün u l'oter müda sieu domicil a Zuoz e la vschinauncha po cun que generer dapü entredas. Il vicepresident cumünel s'ingrazcha tar sar Luzi Schucan per las spiegaziuns ed evra la discussiun in radunanza.

Üna votanta vules savair perche cha implaunts solars, chi sun ün tema fich actual, nu sun previs per l'an 2023. Ella managia cha sar cusglier Luis A. Wieser ho üna vouta infurmo cha süls repars da lavinias sün Albanas es tuot pront per uschè ün'indriz. Il vicepresident infurmescha cha sclarimaints in quist connex sun in cuorsa sü'l nivel regiunel e cha ün indriz sün Albanas fo part da quists sclarimaints. Il temp nun es auncha madür per büdschetter imports in quista direcziun.

Ün votant vül savair scha l'infrastructura in Purtum nu clama zieva investiziuns. Il vicepresident orientescha cha que saja uschè. Però ho ün investiziun aint ils stabels scolastics prioritad.

Siand cha que nu do otras dumandas po il vicepresident suottametter il preventiv 2023 a la votaziun. La radunanza accepta tel unanimamaing e sainza cuntravuschs.

608 04 Impostas
04.B Taxaziun d'impostas

3. Pè d'impostas cumünelas per l'an 2023

Zieva cha'l depüto da finanzas ho fingià spiego puncts a regard il pè d'impostas agiund-scha il vicepresidente cha'l cussagl cumünel es in fuond da l'avis cha que nun es la lezcha da la vschinauncha da mantuner raps publics. Zuoz es al mumaint in üna situaziun finanziaela fich allegraivla. I'ls ultims duos ans ho il rendaquint serro giò cun grands guadagn, las amortisaziuns pussiblas sun fattas e grands progets sun pür in vista in ca. 3 fin 5 ans. Que permetta, al mumaint, da sbasser il pè d'impostas. Il vicepresidente evra la discussiun per la radunanza.

Üna votanta tuorna sülla tematica dad indrizs da fotovoltaica sün Albanas ed es da l'avis cha üna tela investiziun stu gnir fatta svelta. Ella es perque da l'avis cha sbasser las impostas es la fosa direenziun ed es dafatta da l'avis da s-chaffir ün pot per finanzcher ün proget. Il depüto finanzas piglia il pled e declera ch'üna tela investiziun füss causa las subvenziuns chantunelas eir pussibla cun ün pè d'impostas pü bass scu hoz. Impü nu permetta la contabilited pretaisa dal Chantun Grischun (HRM2) da s-chaffir reservas sainza la basa dad p. ex. ün proget decis da la radunanza cumünela.

Ün oter votant inclegia las resalvas da l'oratura precedainta. El managia cha eir el piglia gugent quist regal da Nadel premadür. El renda però attent cha adapter il pè d'impostas insü es pü greiv scu sbasser el.

Il vicepresidente dumanda la votanta chi'd es cunter la proposta dal cussagl cumünel da sbasser il pè d'impostas sch'ella fo üna cuntraproposta. Ella propuona da sbasser il pè be sün 70% impè da sün 75%.

Siand cha la discussiun es extaisa cuntinua il vicepresidente culla votaziun. La radunanza cumünela decida cun 46 cunter 4 vuschs da sbasser il pè d'impostas sün 65% da l'imposta chantunela simpla.

609 05 Educaziun e cultura
05.B General e particulariteds

Infurmaziun a regard „Uorden da Chalandamarz“

Il vicepresidente orientescha cha l'uorden da Chalandamarz d'eira sto tractando illa radunanza cumünela dal gün da quist an. Zieva animeda discussiun in radunanza, cun fich bunas remarchas, ho il cussagl cumünel retrat la tractanda per tratter aunch'üna vouta. Intaunt haun gieu lö discuors culla cumischiun da Chalandamarz, ma eir discuors bilaterels cun differentas persunas. Il cussagl cumünel ho alura decis da der l'incumbenza la cumischiun da Chalandamarz dad elavurer l'integraziun maximela da las mattas aint il Chalandamarz e da fer üna proposta a maun dal cussagl cumünel. Il vicepresidente po infurmer cha quistas lavuors sun in cuorsa ed il böt es, da decider illa tschanteda dal cussagl cumünel dals 21 december 2022 sur da l'andamaint dal Chalandamarz 2023.

610 01 Organisaziun da vschinauncha
 01.C Radunanza cumünela
Orientaziuns

Situaziun periclitaziun da maungel d'energia:

Il depüto respunsabel, sar Cristian Ferrari, infurmescha cha la vschinauncha es landervi dad elavurer las imsüras cha'l Chantun Grischun pretenda fin uossa. Il stab da guida da la vschinauncha da Zuoz es in funcziun, in reguler contact cullas autoriteds da Cuira e perseguitescha il svilup.

Sanaziun Sunteri: concept

Sar depüto Cristian Ferrari spiega l'intenziun a maun da visualisaziuns süllas folias da la preschantaziun. El declera cha la prüm'etappa dal 2023 prevezza ün nouv mür per metter las urnas. In üna seguond'etappa dal 2024 es previs da refer la plazzetta inua cha's rechatta hoz il mür per las urnas, impü il deposit per s-chart verd. Dal 2025 dessan alura auncha gnir fattas las entredas dal sunteri, rampas per ün meglder access e novs bügls.

Iglüminaziun da Nadel

Il depüto respunsabel, sar Cristian Ferrari infurmescha sur da la nouv'iglüminaziun da Nadel, chi'd es fingià installada. Quista d'eira fingià planiseda e büdschettata aunz cha la tematica d'energia es gnida actuela. La veglia iglüminaziun d'eira sur 20 ans veglia e töchs da reserva bod na a pü disponibels. Culla nouv'iglüminaziun es quist problem scholt. Impü exista quist our da lampinas dad LED e drouva cun que fin 80% pü poch energia.

Üna votanta voul savair, inua cha'l lö pel s-chart verd es in futur sü'l sunteri. Sar Cristian Ferrari respuonda cha previs es ün lö vi dal mür dal sunteri, scha pussibel centrel ed ün po zuppo.

Ün otra votanta declera ch'ella nu vuless üna fossa u üna piazza aint'illa paraid dad urnas, ma ün pro verd sü'l sunteri per metter l'urna anonimamaing.

Üna votanta sustegna quist e manzuna il sunteri San Luregn a Segl inua cha's po esser sepulieu in ün lö indefiniu ed il nom vain miss vi d'üna paraid.

Sar Cristian Ferrari piglia gugent incunter quists tschegns per piglier sü illas ponderaziun e per sclarir scha, ed in che fuorma cha's lascha realiser.

Il vicepresident ingrazcha sar depüto Cristian Ferrari per las spiegaziuns. Impü invida el la radunanza cumünela, la populaziun e giast ad ün act d'avertüra da la nouv'iglüminaziun da Nadel in dumengia ils 27 november sülla piazza da scoula.

Terrain da fabrica illa vschinauncha da Zuoz

Il vicepresident orientescha cha'l cussagl cumünel es al mumaint vi da divers sclarimaints in connex cun terrain da fabrica. La situaziun es influenzada da la revisiun totela da la planisaziun dal lö, chi'd es in ün examinaziun preliminar tal Chantun Grischun. Quist examinaziun ed eir svilup tal stedi paun tuot tenor avair influenza sülla tematica. El metta

eir cler, cha la vschinauncha da Zuoz nu agescha scu patrun da fabrica u investur. La vschinauncha da Zuoz vuless, scha que fo sen, pussibiliter fabricas. Il vicepresident declera cha la vschinauncha ho ün purtret magari cler sur dals bsögns tar la dumanda da fitter abitaziuns. Tar la dumanda zieva acquist dad abitaziuns u terrain es la situaziun pü tuorbla. El invida dimena la radunanza cumünela da der part eventuels interess dad acquist ed investziuns a la chanzlia cumünela.

Il vicepresident infurmescha impü cha i'l Parkegi Centrel saron pront per la stagiun d'inviern nouv quatter staziuns per charger veiculs electric. Il votant chi vaiva fat üna remarcha düraunt l'ultima radunanza cumünela s'ingrazcha per la realisaziun e l'infurmaziun. Impü po il vicepresident eir infurmer cha per la stagiun d'inviern es eir in funcziun il möd da pajamaint digitel „Parking Pay“ tar tuot las uras da parker a Zuoz.

611 01 Organिसaziun da vschinauncha
01.C Radunanza cumünela
01.D.02 Varia

Varia

Ün votant voul savair che chi capita cullas localiteds i'l Center Sur En, zieva cha's ho udieu cha'l fitteder actuel hegia fat bancarutta. Il vicepresident declera cha la relaziun da fit es aunch'adüna cò, e cha'l cussagl cumünel examinescha la situaziun.

Üna votanta spiega cha'l nouv adressamaint pissera per disturbis culla posta e oters furnituors. Il vicepresident spiega cha la vschinauncha es landervi da monter las novas tevlinas dals edifizis ed alura eir da las vias. Sül müdamaint dal adressamaint tar tuot las dittas externas (Google Maps, DPD, FedEx eui.) nun ho la vschinauncha üngün'influenza.

Ün votant dumanda scu cha' permiss dad ir cul auto sü Pizzet es precis. Il vicepresident spiega cha'l cussagl cumünel ho aderieu ad üna dumanda da l'uster dal restorant Pizzet dad abolir il scumand düraunt la stagiun sted, siand ch'el ho lascho aviert il restorant. Que scu temp da prouva. Zieva bunas experiencias ho il cussagl cumünel prolungieu quist andamaint fin a la fin dal mais october.

Zieva cha nu vain pü dumando il pled ingrazcha il vicepresident cumünel a las votantas ed als votants per la cumparsa e serra la radunanza a las 21:10 in giavüschand a tuots üna bella saira, ün bel temp d'advent e bels dis da festa.

In buna fè

Il vicepresident cumünel Il chanzlist cumünel

Data da publicaziun:
Zuoz, ils 23.12.2022